

Sapigalinnut ulluinnarni nerisassat nioqqutissat nunatsinnut ajornannginnerusumik eqquossorsinnaalernissaannut Naalakkersuisut nalunaarusioqqullugit peqquneqarnissaat pillugu Inatsisartut aalajangiiffigisassaattut siunnersuut. Nunaniit allaniit nioqqutissat taakku eqquossorsinnaanissaannut inatsisitigut qanoq allannguinnissaq pisariaqarnersoq, qanorlu akimikkut Danmarkimiit nioqqutissanut unammillernerusinnaalersinnaaneri nalunaarusiamut ilanngunneqassapput. Nalunaarusiaq kingusinnerpaamik UKA2023-mi Inatsisartunut agguanneqassaaq.
(Inatsisartunut ilaasortaq Aqqalu C. Jerimiassen, Atassut)

Akissuteqaat

(Nunanut Allanut, Inuussutissarsiornermut Niuernermullu Naalakkersuisoq)

Aappassaaneerpeqarnera

Inuussutissarsiornermut Aatsitassanullu Ataatsimiititaliap siunnersuummik peqqissaarullugu suliaqarneranut, isumaliutissiissutaanullu Naalakkersuisut qujapput.

Inatsisartuni siullermeerpeqarnerani siunnersuutip siunertarisaata tapersorsorluarneqarsimanera, ataatsimiititaliap isumaliutissiissummini erseqqissaatigimmagu maluginiarneqarpoq.

Nunanik allanik niueqatigiinnerup annertusarnissaanik, nioqqutissanillu qinigassaqaqarnerulersitsinissamut, tassuunakkullu nioqqutinik immikkut ittunik atuisut pissarsisinnaanissaannut, qinigassaqaqarnerullu nalinginnaasumik annertusarnissaanik sulinerup nanginnissaanut Naalakkersuisut qilanaarput.

Suliniutit aallartinneqareersut, suliniutissatullu eqqarsaatigineqartut pillugit kingusinnerpaamik UKA2023-mi killiffimmik ilisimatitsisoqarnissaanik, Ataatsimiititaliap isumaliutissiissummini noqqaassuteqarnera Naalakkersuisut maluguniarpaat, noqqaassullu tamanna Naalakkersuisut soorunalimi naammassissavaat.

Tamanna tunuliaqutaralugu Naalakkersuisut inassutigaat, Inuussutissarsiornermut Aatsitassanullu Ataatsimiititaliap inassuteqaataa akuersissutigineqassasoq.